

四庫全書

史部

欽定四庫全書

史部

山西通志卷一百二十八

詳校官給事中臣王鍾健

檢討臣德生覆勘

總校官進士臣朱鈐

校對官中書臣吳俊

謄錄監生臣羅翮遠

欽定四庫全書

山西通志卷一百二十八

人物

二十  
八

代州

後五代

李嗣本本姓張氏鴈門人世為銅冶鎮將嗣本少事後  
唐太祖愛之賜姓名養為子從擊居庸關以功遷義  
兒軍使從破王衍瑜遷威遠軍使從攻羅弘信以先

鋒兵破湯陰從莊宗破潞州夾城累以戰功遷代州  
刺史雲州防禦使振武節度使天祐十三年從莊宗  
擊劉鄩於故元城下洺磁諸州六月還軍振武契丹  
入代北嗣本戰歿

李存進振武人本姓孫名重進晉王賜姓名為養子從  
破黃巢莊宗時遷行營都尉侯磁沁二州刺史後代  
李嗣昭為招討使與張文禮子處求戰歿於陣追贈  
太尉

史儼代州人以騎射給事武皇為帳中將驍勇絕衆善  
設伏望塵揣敵所向皆捷

李承嗣代州人從武皇討賊關輔為前鋒攻華陰擒黃  
巢使王汀以獻朱玫亂承嗣率兵援鄜州至渭橋迎  
駕玫既殺入京師承嗣又率兵攻岐人追至趙城合  
大軍攻平陽三日而拔

史建瑭鴈門人父敬思為九府都督常將騎兵為先鋒  
晉王東追黃巢還過上源驛獨敬思與薛鐵山賀回

鵬等十餘人侍梁兵夜圍驛敬思登驛樓射殺梁兵  
十餘人晉王綽尉氏出門敬思為梁追兵所得見殺  
建塘少為裨校自晉拒潞州已為晉兵先鋒梁兵數  
為建塘所殺相戒常避史先鋒王景仁攻趙建塘以  
先鋒兵出井陘戰于栢鄉周德威擊其左建塘擊其  
右梁軍皆走遂大敗之以功加檢校左僕射天祐九  
年晉攻燕梁太祖自將圍趙棗彊蓆縣以救燕時晉  
精兵皆北攻燕獨符存審與建塘以三千騎屯趙州

梁軍破棗彊存審扼下博橋建塘分其麾下五百騎  
為五隊一之衡水一之南宮一之信都一之阜城而  
自將其一約各取梁芻牧者十人會下博至暮擒梁  
兵數十皆殺之各留其一人縱使逸去告之曰晉王  
軍且大至明日率百騎為梁旗幟雜其芻牧者暮叩  
梁營殺其守門卒縱火大呼斬擊數十百人而梁芻  
牧者各有所亡失又傳言晉軍且至梁太祖夜拔營  
去修縣人追擊梁軍多獲輜重鎧甲梁太祖方病由

是增劇而晉軍以故得并力以收燕者二人之力也  
後從入魏博敗劉鄩於故元城累以功歷貝相二州  
刺史十八年討張文禮以先鋒兵下趙州執其刺史  
王鉞攻鎮州城門中流矢卒年四十二子匡翰尚晉  
高祖女魯國長公主匡翰沈毅有謀接下以禮歷天  
雄軍步軍彰聖馬軍都指揮使事晉為懷和二州刺  
史鄭州防禦使義成軍節度使兵民愛之匡翰好讀  
書尤喜春秋三傳義成軍從事關徹嘗醉罵匡翰曰



近聞張彥澤嚮張式未見史匡翰斬關徹匡翰引滿  
自罰慰勉之人皆服其量卒年四十

郭崇韜代州鴈門人為河東教練使為人明敏能應對  
以幹材見稱莊宗為晉王孟知祥薦之代為中門使  
甚見親信晉兵圍張文禮契丹救之至新樂晉人欲  
解圍去崇韜曰契丹之來非救文禮為王都以利誘  
之耳且晉新破梁軍宜乘已振之勢不可遽自退怯  
莊宗然之果敗契丹莊宗即位拜兵部尚書樞密使

梁王彥章擊破德勝唐軍東保楊劉莊宗出戰復敗  
問崇韜計安出是時唐已得鄆州矣崇韜曰彥章圍  
我於此其志在取鄆州也臣願得兵數千據河下流  
築壘於必爭之地以應鄆州為名彥章必來爭既分  
其兵可以圖也然版築之功難卒就陛下日以精兵  
挑戰使彥章兵不得東十日壘成矣莊宗遣崇韜與  
毛璋將數千人夜行渡河築壘於博州東晝夜督役  
六日壘成彥章果引兵急攻壘不克所失大半還趨

楊劉莊宗迎擊遂敗之康延孝自梁奔唐崇韜延之  
卧内盡得虛實是時莊宗軍朝城段凝軍臨河諸將  
謂成敗未可知請棄鄆與梁而西取衛州黎陽以河  
為界與梁約罷兵毋相攻莊宗召崇韜問計崇韜曰  
陛下興兵仗義將士疲戰爭生民苦轉餉者十餘年  
矣況今大號已建自河以北人皆引首以望成功而  
思休息今得一鄆州不能守而棄之雖欲指河為界  
誰為陛下守之且唐未失德勝時四方商賈征輸畢

集薪芻糧餉其積如山自失南城保楊劉道路轉徙  
耗亡大半而魏博五州秋稼不稔竭民而斂不支數  
月此豈按兵持久之時乎臣自康延孝來盡得梁之  
虛實此真天亡之時也願陛下分兵守魏固楊劉而  
自鄆長驅擣其巢穴不出半月天下定矣莊宗問司  
天司天言歲不利用兵崇韜曰古者命將鑿凶門而  
出況成算已決常談何足信也莊宗即日下令軍中  
歸其家屬於魏夜渡楊劉從鄆州入襲汴州八日而

滅梁賜崇韜鐵券拜侍中成德軍節度使依前樞密使莊宗與諸將以兵取天下而崇韜未嘗居戰陣徒以謀議居佐命第一功位兼將相遂以天下為己任遇事無所回避而宦官伶人用事特不便也初崇韜與宦官馬紹宏俱為中門使而紹宏位在上及莊宗即位崇韜以張居翰為樞密使紹宏為宣徽使紹宏側目崇韜多裁抑伶人常諫曰陛下所與共取天下者皆英豪忠勇之人今大功始就封賞未及而先以

伶人為刺史恐失天下心伶人亦多怨之崇韜頗懼  
故人子弟曰今中宮未立而劉氏有寵宜請立劉氏  
為皇后而多建天下利害以便民者白之崇韜乃上  
書請立劉氏為皇后崇韜素廉入洛始受四方賂遺  
或以為言崇韜曰今藩鎮諸侯多梁舊將皆主上斬  
祛射鉤之人也若一切拒之豈無反側且藏於私室  
何異公帑明年南郊乃悉獻其所藏以佐賞給已郊  
遂立劉氏為皇后崇韜畧表乞身莊宗不許因建天

下利害二十五事施行之徙忠武節度使自陳權位已極言甚懇至遂罷其命仍為侍中樞密使同光三年夏莊宗患宮中暑濕遣宮苑使王允平營高樓宦官曰郭崇韜眉頭不伸嘗為租庸惜財用陛下雖欲有作其可得乎乃使人問崇韜曰昔吾與梁對壘於河上雖祁寒盛暑被甲跨馬不以為勞今居深宮陰廣廈不勝其熱何也崇韜對曰陛下昔以天下為心今以一身為意艱難逸豫為慮不同其勢自然也願

陛下無忘創業之難常如河上則可使繁暑坐變清涼莊宗默然終遣允平起樓崇韜果切諫宦官曰崇韜之第無異皇居安知陛下之熱由是讒間愈入河南縣令羅貫頗為崇韜所知貫不受權豪請託宦官伶人書積几案一不報又奉河南尹張全義不屈縣民恃全義為不法者皆按誅之全義使人告劉皇后為白貫事而左右日夜共攻其短會皇太后崩葬壽安坤陵莊宗幸陵作所道路泥塗橋壞宦官言屬河



南即下貫獄明日傳詔殺之崇韜諫曰貫罪無佗橋道不修法不當死莊宗怒曰太后靈駕將發天子車輿往來橋道不修卿言無罪是朋黨也崇韜曰貫雖有罪當具獄行法於有司陛下以萬乘之尊怒一縣令使天下人言陛下用法不公臣等之過也莊宗曰貫公所愛任公裁決因起入宮崇韜隨之論不已莊宗自闔殿門崇韜不得入貫卒見殺明年征蜀議擇大將崇韜以讒見危思立大功為自安之計乃請魏

王繼岌為元帥莊宗曰公為我擇其副崇韜未及言  
莊宗曰吾得之矣無以易卿也乃以繼岌為西南面  
行營都統崇韜為招討使軍政皆決崇韜唐軍入蜀  
所過迎降遂平蜀嘗謂繼岌曰王有破蜀功師旋必  
為太子當盡去宦官至於駟馬亦不可騎繼岌監軍  
李從襲等切齒莊宗遣宦官向延嗣勞軍崇韜不郊  
迎延嗣大怒因與從襲等共搆之延嗣還上蜀薄莊  
宗少之延嗣因言蜀之寶貨皆入崇韜且誣其有異

志莊宗怒遣宦官馬彥珪至蜀視崇韜去就彥珪以告劉皇后劉皇后教彥珪矯詔魏王殺之崇韜子五人其二從死於蜀餘皆見殺其破蜀所得皆籍沒明宗即位詔許歸葬以其太原故宅賜其一孫當崇韜用事時自宰相豆盧革韋悅等皆傾附之崇韜父諱弘草等即因佗事奏改弘文館為崇文館以其姓郭因以為子儀之後崇韜伐蜀過子儀墓號慟而去聞者頗非之然崇韜盡忠國家有大畧其已破蜀因遣

使者以唐威德風諭南詔諸蠻欲因以綏來之可謂  
有志矣

安彥威字國俊代州崞縣人少隸唐明宗麾下善射頗  
知兵法明宗出鎮常為牙將以謹厚見信及秦王從  
榮鎮鄴為護聖指揮使從榮判六軍遷捧聖指揮使  
領寧國軍節度使晉高祖立拜北京留守從鎮歸德  
時河決滑州命塞之彥威出私錢募民治隄遷西京  
留守歲大饑賑撫饑民犯法者皆寬貸之饑民不忍

流去母憂哀毀過制出帝時拜北面行營副都統悉  
出家財佐軍用以疾卒彥威與安太妃同宗出帝事  
為舅彥威未嘗自言及卒太妃臨哭人始知其同宗  
也當時益稱其慎重

張敬達字志通代州人小字生鐵少以騎射為廳直軍  
使明宗時為河東馬步軍都指揮使領欽州刺史累  
遷彰國大同軍節度使徙鎮武信晉昌清泰二年為  
北面副總管以分節度使石敬瑭之兵三年夏徙敬

塘鎮天平遂以敬達為大同彰國振武威塞等軍蕃  
漢馬步軍都部署敬塘拒命即以敬達為太原四面  
招討使六月兵圍太原九月遼太宗自鴈門入援敬  
塘敬達陣於西山遼師以羸騎三千趨唐軍唐軍爭  
馳之遼兵走追至汾曲伏發死者萬餘人敬達收軍  
柵晉安遼師圍之自晉安寨南長百餘里濶五十里  
唐遣趙延壽范延光等來救皆不敢前副招討使楊  
光遠勸降敬達不忍背唐光遠促之不已敬達曰諸

公何相迫邪何不殺我而降光遠即斬敬達降遼太宗哀其忠遣人收葬之

郝勝字世剛崞縣人隆之後氣槩勝人仕晉為管軍戶懸帶銀符

扈彥珂代州鴈門人幼事王建立以謹厚稱晉天福中建立遺表薦彥珂得補河東節度左都押衙漢初擢宣徽南院使尋授鎮國軍節度華商等州觀察處置使乾祐初周祖總兵征三叛道出華州時議多以先

討王景崇趙思綰為便周祖意未決彥珂曰三叛連  
衡推李守貞為主宜先擊河中河中平則永興鳳翔  
失勢矣今舍近圖遠若景崇思綰逆戰於前守貞兵  
其後腹背受敵為之奈何周祖從其言及平河中  
以功遷護國軍節度朝議少其暗弱廣順初就加同平  
章事移鎮滑州歲餘代歸請開宴不納以滑州李守  
貞宅賜之世宗賜左衛上將軍顯德三年授開府儀  
同三司太子太師致仕歸西京宋初就賜器幣數月



卒年七十五

宋

楊宗閔代州崞縣人為永興軍路總管與唐重同守永興金人陷城迎戰死之後謚忠介賜廟曰顯忠

楊震字子發代州崞縣人善騎射為安邊巡檢河東軍征臧底河敵據山為城下瞰官軍震率壯士拔劍先登斬數百級衆乘勝平之上功第一從折可存討方臘自浙東轉擊至三界鎮斬八千級追襲至黃巖賊

帥呂師囊扼斷頭之險下石肆擊累日不得進震請以輕兵緣山背上憑高鼓譟發矢石賊驚走已復縱火自衛震身被重鎧與麾下履火突入生得師囊殺首領三十人進秩五等還知麟州建寧砦初遼將小博囉西奔破豐州攻麟府震父宗閔屢摧敗之俘其父母妻子靖康元年十月太原陷博囉圍建寧扣壁語震令降時守兵不滿百震約斬一級賞若干官帑竭繼以家人服珥吏士感奮越旬矢盡城不守與子

居中執中力戰沒年四十四閭門俱喪唯長子存中  
從征河北獨免明年宗閔亦死事於長安建炎二年  
贈武經郎後諡曰忠毅

楊存中本名沂中字正甫代州崞縣人魁梧沈鷖少讀  
書數百言力能絕人慨然語人曰大丈夫當以武功  
取富貴焉用俯首為腐儒哉於是學孫吳法善騎射  
宣和末應募擊賊積功至忠翊郎靖康元年與張俊  
田師中從信德府守臣梁揚祖以萬兵援汴後隸張

俊部曲俊薦之召見賜袍帶晝夜扈衛寢幄不頃刻  
去側上知其忠謹親信之劇賊李昱據任城以數騎  
入擊殺數百人以上乘高望見介冑盡赤壯之飲以酒  
曰酌此血漢存中請復往曰此賊膽碎即成擒矣遂  
大破之復任城遷閣門祗候建炎二年討賊徐明於  
嘉興先登主帥將屠城力諫止之郡賴以全遷滎州  
刺史高宗南渡以勝捷軍從張俊守吳門從討苗劉  
遷貴州圍練使尋為御前右軍統領金人攻明州又

從俊殊死戰破之以奇功遷文州防禦使御前中軍  
統制紹興元年從俊討李成諸將欲分道進存中曰  
兵分則力弱又諸將位均勢敵非招討督之必不用  
命俊然之存中率兵數十首破賊於豫章王隆觀追  
至筠州賊驍將以衆十萬來援存中謂俊曰彼衆我  
寡擊之當用奇願以騎見屬公以步兵居前後從之  
存中夜銜枚渡筠河出西山馳下擊賊俊以步兵夾  
攻俘八千人諸將議盡殲之存中曰殺降吾不忍遂

乘勝追至九江成遁去遷宣州觀察使二年春進神武中軍統制宰相呂頤浩袖勅授之俊奏留上曰宿衛之帥朕所選用不可易也存中固辭且謂位與韓世忠張俊抗實不自安不許遣中使宣押乃視事兼提舉宿衛親兵時中軍卒不滿五千請拘神武卒借出者軍政寢修三年討平嚴州妖賊繆羅除帶御器械加保信軍承宣使權發遣廊延路馬步軍副總管六年為龍神衛四廂都指揮使密州觀察使先是韓

世忠圍淮陽乞張俊將趙密為助趙鼎曰存中武勇  
不減於密盍令存中助之都督張浚請於朝故有是  
命於是存中以八隊萬人趨督府助世忠十月劉猺  
衆十萬次濠壽間浚使存中往泗州與張俊合賊先  
犯定遠存中以兵二千襲取於越家坊既而與猺兵  
遇藕塘賊據山列陣矢下如雨存中急擊之且使統  
制吳錫以勁騎五千突其陣陣亂存中鼓大軍乘之  
自以精騎衝其脅大呼曰破賊矣賊錯愕駭視前軍

統制張宗顏自泗來乘背擊之賊大敗猊以首抵謀主李愕曰適見髯將軍銳不可當果揚殿前也即以數騎遁去餘黨萬人僵立存中躍馬叱之皆怖而降劉麟時在順昌孔彥舟圍光州皆拔砦遁得賊舟數百艘車數千兩上遣中使勞賜謂宰執曰卿輩始知朕得人也除保成軍節度使殿前都虞候尋兼領馬步帥存中奏祖宗置三衙鼎列相制今令臣獨總非故事也不允七年為淮南西路制置使不果行九年



遷殿前副都指揮使十年為淮北宣撫副使引兵至  
宿州以步軍退屯於泗將五百騎夜襲柳子鎮黎明  
不見敵而還金人以精兵伏歸路遂橫奔而潰既而  
自壽春渡淮歸泗人心始安冬引兵還十一年以殿  
司兵三萬戍淮與金戰於柘皋金兵以拐子馬翼進  
存中曰敵恃弓矢吾有以屈之使萬人操長斧如牆  
而進諸軍鼓譟奮擊金人大敗退屯紫金山死者以  
萬計而濠圍猶未解宣撫使張俊邀存中及判官劉

錡會於黃連埠距濠六十里聞城陷存中曰戰爾相公與太尉在後存中當居前錡請退師據險俊命存中與都統制王德偕至濠煙起城中金人伏萬騎分兩翼出存中以策麾軍曰那回諸軍以為令其走也遂奔自宣化渡江歸加檢校少保開府儀同三司兼領殿前都指揮使蓋錄柘皋之功也十二年都護永固陵拜少傅十四年請詣太學上曰學校既興武人亦知崇尚如漢羽林士皆通孝經況其他乎二十年

封恭國公二十八年拜少師恩數視樞密使存中以  
凡重地皆有統制官獨荆襄無之請於朝於是荆南  
襄陽初置諸統制存中在殿巖凡二十五載權寵日  
盛李浩陸游王十朋陳俊卿相繼言之三十一年罷  
為太傅醴泉觀使進封同安郡王賜玉帶朝朔翌上  
備敵十策九月為御營宿衛使命往京口為守江計  
與虞允文協力拒敵敵不能濟遂輕舟渡江以伺敵  
及金請和存中奏無遽許之上如建康詔扈蹕因語

宰相曰楊存中唯命東西忠無與二朕之郭子儀也  
金復請和存中請拘之江口移書審問若能歸我族  
屬還舊壤損歲幣復白溝之界以通兄弟之好如是  
則和議可從不然請斬其使亟圖恢復會駕還以為  
江淮荆襄路宣撫使給舍不書黃仍奉祠隆興元年  
復起為御營使二年議割蜀之和尚原以畀金存中  
入對曰和尚原隴右藩要敵得之則可以睥睨漢川  
我得之則可以下兵秦雍曩議予金人吳璘力爭不

從今璘在遠不及知臣若不言非特負陛下亦有媿  
於璘近者王師盡銳而後得願毋棄未幾詔同都督  
江淮事升都督陞辭賜坐賜玉鞍勒時諸軍各守分  
地不相統一存中集諸將調護之始更相為援上親  
札賜之曰諸帥協和互相策應卿之力也會金深入  
朝議欲舍淮保江存中持不可乃已金兵在揚州臨  
江固壘以老之金尋請盟乾道元年班師加昭慶軍  
節度使復奉祠時興屯田獻楚州私田三萬九千畝

二年卒年六十五以太師致仕追封和王謚武恭高宗追念舊臣為之出涕賻錢十萬高宗眷存中尤深嘗曰朕於存中撫綏之過於子弟存中天資敢勇大小二百餘戰身被五十餘創宿衛出入四十年最寡過孝宗以為舊臣尤禮異之呼郡王而不名嘗以家廟祭器為請遂許祭五世前所無也祖母劉流落蜀隴日夜禱祠訪問卒迎以歸御軍寬而有紀將士專以才勇選不私部曲李顯忠以罪斥奏為統制官後

為名將嘗以尅敵弓雖勁而蹶張難遂以意創馬皇  
弩思巧製工發易中遠人服其精云子傑工部侍郎  
俟簽書樞密院事昭慶軍節度使

金

李師雄字伯威雁門人有材力喜談兵慕古之英雄故  
名師雄宋宣和中以騎射登科累官大名清平尉金  
師至出降攝兵馬都監為齊大總管府先鋒都統制  
知淄州齊廢為汴京馬軍都虞候歷知寧海軍曹州

刺史皇統二年為武勝軍節度使正隆末為河州防禦使以事就逮臨洮宋將吳璘兵至城下州人謀出降師雄止之宋將權儀鞭馬上浮橋射之墜橋下遂擒之宋師退後從元帥左監軍圖克坦喀齊喀攻河州有功未幾疾卒

張永通五臺人大節之祖宋鄉學生舉鄉薦友睦兄弟田宅悉以推之鄰有寄筭毫無所動試進士稿就未成真忽目眩不能書有欲為之代者不許曰予之忽



不能視乃天之所以示懲也代之則欺君以欺天矣  
得第何為翰林蘇珊銘其墓曰功名糠粃富貴浮雲  
宗族稱友鄉黨稱仁

張大節字信之代州五臺人擢天德三年進士第調崞  
縣丞改東京市令世宗判留務甚愛重之海陵修汴  
京命領其役世宗改元或勸東赴富貴可一朝遂答  
曰自有定分何遽爾隨例補尚書省令史擢秘書郎  
大理司直會左警巡使闕世宗謂宰臣曰朕得其人

矣遂授大節以杖殺豪民解職未幾起授同知洺州防禦使事入為太府丞工部員外郎盧溝水嚙安次承詔護視堤城擢修內司使推排東京路戶籍人服其平進工部郎中與吏部員外郎麻珪泣阜通監鑄錢積銅皆竄惡議徵民所給直大節獨以為有司受納之過於民何與事聞得免就改戶部郎中廉得定襄退吏誣縣民匿銅者十八村坐吏罪名斲石以頌召授工部侍郎改戶部世宗東巡徙太府監從行支

應皆藉以辨尋為宋生日使還授橫海軍節度使過  
闕謁謝東宮顯宗撫慰良久曰萬事惟中可也因榜  
其公堂曰惟中郡境有巨盜久不獲因設方略擒之  
河自衛決而東相宜繕堤水不為害章宗即位擢中  
都路都轉運使言河東賦重宜減議者不同大節以  
他路田賦質之遂命減焉乞休優以鄉郡徙知太原  
府近郭有男子被殺聞其妻哭聲不哀召而審之果  
獲姦夫人以為神西山有晉叔虞祠舊有施錢輸公

使庫悉還之令給營繕選授河東路提刑使未赴留  
知大興府治有能名閱歲復移廣寧轉震武軍節度  
使部有銀冶議以官權為便獨奏山澤之利當與民  
共宜明示約束於民授地輸課則游手者有所資當  
官者無所損斯為兩便上從之世宗嘗語宰臣大節  
賦性忠實果於從政遠在王脩之上惜乎用之太晚  
又語近臣曰某某非不幹然不及張大節忠實也致  
仕承安五年卒年八十大節廉勤好學能勵勉後進

所學得於任個待個子如親而加厚又善弈棋當世  
推為第一與張景仁埒

張巖叟字孟弼大節子大定十九年進士調葭州司候  
判官再除雄州觀察判官補尚書省令史除大理評  
事再遷監察御史同知河東北路轉運使事中都路  
都轉運副使刑部員外郎忻州刺史父憂闋起復大  
理少卿河北東西大名等路按察轉運副使累遷刑  
部侍郎兼夔王傅太常卿兼國子祭酒大安三年集

三品官議塞諸城門以為兵備嚴叟曰塞門所以受兵是任城而不任人莫若遣兵擇將背城疾戰時議多之除鎮西軍節度使移定國軍貞祐二年改昭義復移沁南逾年以老致仕退寓洛陽卒

胥鼎字和之繁峙人持國子也大定二十八年進士第入官以能稱累遷大理丞父喪起復為著作郎宰臣奏鼎甚幹濟章宗曰著作職閒今姑授之尋歷右司郎中工部侍郎泰和六年言急遞鋪轉送文檄之制

從之至寧初中都受兵繇戶部尚書拜叅知政事貞祐初出觀察兗州未赴改知大興府兼中都路兵馬都總管二年正月民多闕食奏有能贍給貧人者宜計所贍遷官升職以獎勸之遂定權鬻恩例如進官升職丁憂人許應舉求仕官監戶從良等入粟草各有數全活甚衆二年四月拜尚書右丞仍兼知府事五月宣宗南遷留為汾陽軍節度使兼汾州觀察使十一月改知平陽府兼河東南路兵馬都總管三年

四月建言利害如積軍儲備黃河選官讞獄簡將練卒鈔法版籍凡十三事上頗採用又請降空名宣勅千道度牒三千以補軍儲七月就拜宣撫使兼前職言代州戍兵不可調發又言清野當先太原北路而後平陽南路既而元兵果出境賜詔獎諭曰卿以文武之才膺兵民之寄往鎮方面式固邊防坐釋朕憂孰如卿力益懋忠勤之節以收綏靖之功仰副予心嗣有後寵尋進官一階又請便宜置總領義軍使副



及彈壓每五千人設訓練一員四年正月元兵略霍  
吉隰三州復以步騎六萬圍平陽急攻十餘日屢劔  
之招還脅從人七千有奇續至者又六千餘請優加  
存恤二月拜樞密副使權尚書左丞行省於平陽時  
鼎抗表求退上不許因晉拜焉且遣近侍諭曰卿父  
子皆朕所知向卿執政時因有人言遂以河東事相  
委果能勉力以保無虞方國家多難非卿孰可倚者  
卿退易耳能勿慮社稷之計乎今特授卿是任咫尺

防秋更宜悉意鼎請陝州大陽渡河中大慶渡無邀  
阻粟麥過河聽其輸販以紓解州之急從之又請潞  
州帥府無搜括遼沁諸州餘粟又請霍州回牛鳳棲  
嶺諸院戍卒量留偵候餘悉遣歸又請潞州元帥府  
鬻爵恩例增益其餘如中都時而行省行部量民力  
徵斂交鈔鼎所言皆利益民兵不為高談虛畫事胥  
允行是歲冬元兵駐同耀鼎偵知勢將叩關委河中  
經略使圖們呼圖克們領軍赴援宰臣請命鼎益兵渡

河以掣其肘鼎聞元兵已越關先遣潞州元帥左監  
軍必喇阿魯忒領軍一萬孟州經略使圖克坦伯嘉領  
兵五千由便道濟河以趨關陝乃委知平陽府王質  
同知府事完顏僧嘉努權左右監軍以鎮守河東鼎  
時拜尚書左丞兼樞密副使自領河東南路懷孟諸  
軍合萬五千由河中部道入援而遣河中府判官布  
薩薩固珠領軍趨陝西併力禦之且慮北兵扼河移  
檄絳解吉陽孟州經略司會兵以為夾攻之勢已而

元兵果由三門集津北渡而去上言河北潰散軍兵  
流亡人戶及山西河東老幼俱從河南在處僑居各  
無本業易至動搖倘北兵誘為鄉道驅之攻城豈不  
益資其力乞朝廷遣官撫慰及令所司嚴為防閑庶  
幾不至生釁上從其計遣御史陳規等充安撫捕盜  
官巡行郡邑元兵還至平陽鼎遣兵拒戰不利乃去  
興定元年正月命選兵三萬五千付圖們呼圖克們統  
之西征馳奏曰自北兵經過之後民食不給兵力未

完若又出師非獨饋運為勞而民將流亡愈至失所  
或宋人乘隙而動復何以制之此繫國家社稷大計  
方今事勢止當禦備南邊西征未可議也遂止尋晉  
拜平章政事封莘國公三月詔鼎舉兵伐宋且令勿  
復有言以沮成算鼎已分兵繇秦鞏鳳翔三路並進  
而上書極陳其六不可宰臣以為諸軍既進無復可  
議遂寢既而元帥承裔等取宋大散關上問鼎鼎奏  
散關至驀關諸隘其地遠甚中間堡壘相望如欲分

屯非萬人不可而又有恒州號縣所直數關宋兵皆  
固守如舊緩急有事當復分散關之兵餘衆數少必  
不能支而鳳翔恒隴亦無應援恐兩失之不若焚燬  
此關但屯邊隘以張其勢彼或來侵互相應援易為  
力也後承裔伊喇布哈克武休將至興元鼎請諭帥  
臣無肆焚掠若一郡帖然秋毫不犯則其餘三十軍  
將不攻自下矣上是之及論伐宋功遷官一階二年  
鼎以宣宗多親細務奏言天下之大萬機之衆錢穀

之冗非九重所能兼必付之有司天子操大綱責成  
功而已況今多故豈可躬親細務臣願自今委任大  
臣坐收成算上覽奏不悅高琪曰法上天行健太平  
之階也鼎言非是上喜之三年正月請掌兵守邊隘  
官減資歷月日如沿邊州府官格又言近制軍前立  
功犯罪之人行省行院帥府不得輒行誅賞夫賞由  
中出則恩有所歸茲固至當至於部分犯罪主將不  
得施行則下無所畏而令莫得行矣詔自今四品以

下官皆得裁決時元兵復入陝西朝臣或中沮之上  
諭樞密院曰鼎規畫必無謬誤自今令節制河東鼎  
多料敵策九月元兵徇東勝州又令領兵赴河中上  
嘗謂宰臣曰鼎薦巴古拉自代巴古拉固佳至於駕馭  
人才處決機務不及鼎多矣卿等不須指授又遣諭  
曰卿專制方面不必一一中覆徒為逗留也四年進  
封溫國公致仕仍居京師嘗遣近侍就第延問時勅  
宰臣邀赴省議利害焉晉陽公郭文振又以總制公



府薦之哀宗正大二年起拜平章政事進封英國公  
行尚書省於衛州上諭曰卿向在河東朝廷倚重今  
河朔州郡多歸附須卿圖畫卿先朝大臣必濟吾事  
大河以北卿皆節制鼎力疾赴鎮河朔州郡來歸者  
益衆三年復請老且舉代者詔答曰卿往在河東殘  
破孤危殆不易保卿一至而定迄卿移鎮敵不復侵  
何乃過為嫌避且君臣均為一體朕待下亦豈自殊  
自外之語殆為過計況餘人才力孰可副卿者卿年

高久勞於外朕豈不知但國家百年積累之基河朔  
億萬生靈之命卿當勉出壯圖同濟大事鼎惶懼不  
敢退是年七月卒鼎通達吏事有度量為政鎮靜所  
在無賢不肖皆得其懽心南渡以來書生鎮方面者  
惟鼎一人而已

聶天驥字元吉五臺人至寧進士調汝陰簿歷睢州司  
候封雖令興定初辟尚書省令史時胥吏擅威士多  
附之獨天驥不少假借尋授吏部主事權監察御史

夏使互市會同館外戚有身貿易者天驥言大官近利失朝廷體且取輕外方遂忤太后旨出為同知汝州防禦使事未赴特旨遙領金安軍節度副使兼行陝西尚書省都事未幾入為右司員外郎轉京兆治中尋行衛州尚書六部事宿州總帥約赫德救慶陽充經歷官圍解從別帥守邠帥欲棄州而東天驥力勸止之不從帥逮天驥降京兆治中尋有訟其寃者召為開封簽事旬月復右司員外郎母憂奪哀復職

留汴中崔立變天驥被創甚卧一十餘日其女舜英  
謁醫救療天驥歎曰吾幸得死兒女曹乃為謁醫尚  
欲我活耶竟鬱鬱以死

禹顯鴈門人貞祐初隸上黨公張開累有戰功授義勝  
軍節度使兼沁州招撫副使元光二年四月元將達  
哩岱安扎爾攻河東張開遣顯扼龍舟谷夾攻敗之  
擒元帥韓光國獲輜重甲仗甚衆追至祁縣而還所  
歷州縣悉復之顯願將兵二百守襄垣八年不遷元

將集河朔步騎數千攻之數四不能拔既而戰於玉  
女寨大獲開言於朝權元帥府都監正大六年十一  
月軍內變城破被擒帥以鐵繩鈐之密與部曲二十  
人遁去將往從開元兵四向追顯顯匿山寺中被執  
不屈死時年四十一

楊閏代州人少孤鞠姊夫禹顯家後上黨公張開令顯  
以綿上招撫使守襄垣閏從之晝止敵驅夜斫營凡  
戰禦事不以勞顯塹夷城積石力戰五年敵引去不

敢逼授懷遠大將軍同知沁南軍節度使事尋行銅鞮令行夜至隘樓止宿其上中敵偵刺未殊猶張空拳搏數人以僨年二十有九明年顯亦斃開不能獨守上黨遂走汴

劉會繁峙人興定間起布衣授堅州判官時當草創會披荆棘捍豺虎政績著聞累遷驃騎上將軍堅州都元帥兼節度使

楊思義崞縣人年十四登第受文水簿調孟縣政績顯

著陞太谷令

喬天翼五臺人金末為合河令元兵至城陷不屈死

完顏玖珠武州刺史元兵挾其子姪抵城下曰苟不速降俱殺之佳曰以死報國遑恤家屬城破力戰而死

元

王兆繁峙人少有雄氣好俠遊排難解紛不避強禦元兵及縣境金人棄城奔潰城中遺民謀走南山乃率衆詣主帥款附邑賴以安累遷昭武將軍節游獵勤

政務招集散亡勸課農桑弟斌善騎射兆恃為爪牙  
嘗捕金將武仙餘黨於五臺山中

韓仲彬繁峙人至元間以明經舉知應州金城縣事為  
政公平持身廉謹後同知堅州服官益虔以績最遷  
知代州

皇甫德丰采奇偉穆呼哩器之延諮時務德議論英發  
拜信威將軍本州觀察判官行元帥府事扇仁風鋤  
強梗興學校勸農桑民以良牧稱之



劉好德幼聰明德學昭著仕為高平尹縣久凋殘民多  
流移好德撫安復業興學育才士風丕變

殷仲溫繁峙人父珍有隱德州縣累辟不就仲溫廉慎  
膚敏起家奉宸副使有政績五遷朝列大夫僉中書  
院事

王克義崞縣人幼好學至正初由國子生授平準職轉  
定襄縣尹旬月而治民比之龍圖常騎驢往來其家  
人至今稱之

明

齊麟五臺人洪武乙丑中式殿試二甲第一入翰林為  
編修累官禮部右侍郎稱理學名臣

韓士奇繁峙人永樂庚子舉人歷任陝西分巡關內道  
天順間賊首定山等嘯聚圖攻漢中士奇募兵礪器  
潛伏要地故梳洗橋西岸下候賊兵半渡縱兵擊之  
賊大潰生擒定山黨屬五百餘賊遂平以薦陞本司  
副使

弋謙代州人永樂九年進士除監察御史出按江西言  
事忤旨貶峽山知縣復坐事免仁宗素知謙骨鯁召  
為大理少卿直陳時政多見納既復言五事詞太激  
上不懌尚書呂震等因劾謙誣罔都御史劉觀令衆  
御史合糾謙楊士奇曰謙不諳大體然心感超擢恩  
欲圖報耳主聖則臣直惟陛下優容之上乃不罪謙  
然每見謙詞色甚厲士奇從容言陛下詔求直言謙  
言不當觸怒外廷悚惕以言為戒今四方朝覲之臣

皆集闕下見謙如此將謂陛下不能容直言矣上惕然曰此固朕不能容亦呂震輩迎合以益朕過今自當置謙遂免謙朝參令專視司事言事者益少上復召士奇曰朕怒謙矯激過實耳朝臣果月餘無言爾語諸臣白朕心士奇乞親降爾書遂引過諭百官無以謙為戒而復謙朝參已中官採木四川貪橫召謙諭曰爾清鯁為朕往治之擢副都御史賜鈔以行遂罷採木之役宣德初為交趾右布政使王通棄交趾

謙亦論罪正統初釋之土木之變謙布衣赴闕下薦通  
及甯懋阮遷等十三人皆奇才可用廷臣奏留謙不  
報景泰二年復至京疏薦通等于謙奏錄通等命弋  
謙代臣總軍務不許罷歸卒

賈忠崱縣人正統甲子舉人知滄州有異政設法救荒  
民無失所九年滿民詣闕請留更任九年累遷苑馬  
寺卿

田益字損之崱縣人性忠孝鯁直不阿勢力天順己卯

舉人知河南光山縣廉明果斷政稱第一擢監察御史權倖斂跡巡鳳陽政多平反貪污望風解綬陞陝西僉事兵備甘州甚有政譽

王鑰代州人天順己卯舉人授開封府訓導期年解組歸教授郡中明經之士多出其門晚年益工詩好游覽足跡徧境內所著有鴈門勝跡稿

梁璟字廷美崞縣人天順末進士授兵科給事中成化時屢遷都給事中項忠驅荆襄流民復業劾其縱兵

逼迫延綏用兵令山西預征芻粟以供民相率逃太原一縣五日而逃者甚多璟疏陳其困獲寬減又請順天永平二府分設一巡撫以薊州邊務屬之令巡撫陳濂專撫保定六府兼督紫荆諸關從之遂為定制已請起致仕尚書王竑李秉而斥都御史王越并及宮闈隱事被杖武靖伯趙輔謀典營府事極論其罪乃罷擢陝西左叅政分守洮岷西番入寇斬其魁內艱闋還原任歷左右布政使先後在陝十五年多

政績孝宗初遷右副都御史巡撫湖廣弘治二年饑請免徵兩京漕糧八十九萬餘石從之提督五當山中官貢黃精梅笋茶芽諸物武當道士至八百道童更倍月給油臘香楮灑掃夫役以千計中官陳喜又令領護持勅皆力請停免外艱除再撫四川七年召拜南京吏部右侍郎久之就進戶部尚書致仕歸卒趙文博代州人舉進士為御史天順時同張鵬楊瑄等劾石亨曹吉祥下獄擬遣戍尋貶淳化知縣有善政



憲宗初擢衛輝知府特賜封誥累遷右副都御史巡撫河南卒

崔元代州人尚憲宗女永康公主世宗入繼以迎立功封京山侯給誥券諭禮部曰永樂初年太宗入繼大統駙馬都尉王寧以翊戴功進封永春侯非無故事也已坐張延齡事下詔獄尋釋元好文士有譽於時寵幸優渥勛臣戚畹莫敢望焉卒贈左柱國太傅兼太子太傅諡榮恭

趙清代州人成化癸卯舉人授齊河知縣適勘事外出過邑之洪店有盜王山殺人於民人王臻之側衆誣執臻臻不勝榜掠誣服清還至洪店一牛奔向清跪而悲鳴若有所訴清問之則臻牛也清曰臻冤乎遂辨釋臻然殺人者未得衆猶疑後鞫大盜王山因得其情齊河人稱神明作青牛記

張檄代州人成化癸卯舉人歷官陝西副使環慶兵備識明而量弘於兵食計尤練又強記過人凡接於目

者終其身不忘在慶三年以安靜稱之

賀瓚崞縣人成化丙午舉人任三原訓導立心清慎造  
士有方陞南京國子監助教第璠字寶之成化間舉  
人任長安知縣廉靜寡慾改知高陵呂柟有雀飲硯  
池犬驚樂韻之句以事忤逆瑾免官瑾誅起鄠縣多  
惠政

劉淮字濬之號西溪代州崞縣人高祖得賢洪武間調  
戍宣府前衛遂家焉淮有勇力好學問成化庚子襲

陰弘治壬子出守保安新城歷陞宣府副總兵賜飛  
魚一襲龍門所虜酋花當久肆侵犯奮兵勦之捷聞  
進級賜金帛注中府都督僉事佩鎮朔將軍印鎮宣  
府統馭得宜地方寧謐克團營東官廳左叅將武宗  
幸邊邊將爭起取寵淮獨謙退武宗稱為劉夫子嘉  
靖間鎮守關陝終其任虜無侵暴註左軍都督僉事  
奉勅鎮守遼東招來夷落振肅軍威以年老辭歸卒  
於家

王啟嶧縣人成化間貢性剛方授房山知縣不避權倖陞判西安督糧郡縣既有期不果行太守嚴問其故啟曰吾心動恐有親故踰日母訃至巡撫熊嘉其孝感贈以金後補汝寧通判政尚寬簡汝民思焉

謝璽代州人寧波推官鐸子弘治庚戌進士授容城知縣多惠政民有去後思歷按察司僉事以破萬山寇功賜金幣家居廉靜子國表進士國詔國徵舉人表子之甫詔子蘭

王源五臺人弘治十二年進士正德中為川北僉事六年正月行部會賊藍廷瑞鄆本恕等掠通巴至營山源率典史鄧俊禦之皆為所殺贈副使廕子

劉繹字以成代州人弘治丙辰進士授戶部主事遷郎中督理遼東糧儲正德中不肯賄瑾瑾怒械至京師以大枷枷之同鄉有王菴者侍左右晝夜不離月餘得不死冢宰張為言於瑾罷為民後起監察御史遷衛輝知府值賊劉六等剽掠豫中竭力守禦遷長

蘆鹽運司運使致仕歸初繹荷枷時有黃冠至邸遺藥一九謂其家人曰日剝一分食之藥盡則難盡矣是日繹夢仙人自雲中下納藥口中既覺猶有餘香而監守者亦言老人來送藥忽不見一時相傳以為異事云

孫璽字廷信代州人舉於鄉連知諸城扶風縣正德六年都御史藍章以略陽漢中要地舊無城而其令嚴順懦不足任檄璽往城之七年正月功未畢而川賊

至順欲去璽拔刀砍坐几曰欲去者視此乃率僚屬  
監守數日城陷璽被執大罵不屈賊鬻殺之順逃去  
誣璽俱逃溺於江以他人屍斂璽子啟視非是訟於  
朝勘得死節狀贈光祿少卿賜祭予廕抵順罪

孫紹祖字我山代州人檢討紹先弟也正德辛未進士  
選翰林庶吉士授編修嘉靖初纂修武宗實錄賜銀  
幣衣服特厚晉右春坊右中允充經筵講官紹祖長  
身偉儀觀孝友特至在庶常以叔璽官扶風築城略



陽遇賊力戰死略陽官吏匿不以聞與兄力為申理  
得祭葬贈卹如例及泣編修兄卒於里第疏請歸葬  
時一子方殤妻劉以哭子垂斃略不少顧星夜馳至  
家撫柩慟哭既葬奉母張如都侍養官邸後母誕日  
庭下產瑞草一本生平博極羣書詩文超軼有奇氣  
尤工書法卒年四十二

陳皋謨代州人正德辛未進士知三河無錫二縣俱有  
惠政拜工科給事中疏劾席尚書再劾武定侯尋告

歸不再出家徒四壁鄉評重之

閻仲宇字仲夫代州人正德癸酉舉人授華陰知縣以卓異起部郎抗權貴謫州同陞同州知州剔弊舉廢數月而治巨盜劉漢聚衆劫掠前吏不敢問仲宇逮治將具獄盜大言曰吾家累千金豈為盜者意以陰動仲宇即撲殺之民喜形於謠

安瑄五臺人正德間由例貢授夏邑縣丞流賊劉六等焚掠縣境瑄與守城事城破為賊所獲以身殉事聞

贈開封府同知錄子節為國子生河南忠臣錄有贊  
郝璋崞縣人嘉靖壬午舉人授上蔡知縣積粟活民補  
靈寶為政寬而不縱嚴而不苛擢知陳州蝗不入境  
陟大名府同知尤多惠政民思之

阿其麟代州人嘉靖癸未進士授寧晉知縣三年以峭  
直罷歸閉戶擁圖史絕跡城市巡撫楊巍訪之於廬  
再往始一見居蓬蓽無異編氓

謝蘭字與德代州人嘉靖丙戌進士授正定府推官奉

委踏南宮寧晉兩邑皇莊主者欲益賦蘭以地瘠多  
水患力與爭退曰吾寧獲罪上官不忍貽害小民也  
擢監察御史按遼左再按浙江存歷右副都御史巡  
撫陝西秦隴饑黠者嘯聚山巖間肆剽掠蘭為請帑  
金賑餓者復大陳兵威又遣檄諭之斬渠魁數人餘  
黨解散事聞晉秩二品賜金幣有差督臣議復東勝  
蘭力持不可事得寢尋入為兵部侍郎致仕歸卒年  
七十九歲

吳嘉會字惟禮別號南里其先楚人國初從太祖北征  
屯代遂為代人嘉靖甲午書魁乙未進士授行人陞  
刑部主事辨壩上盜有聲郎署間擢山東僉憲賑饑  
築堤禦寇詔賜金帛轉本省藩叅單縣妖人楊惠等  
倡亂官兵攻之不克單車詣壘諭之衆悉解散縛渠  
兇數十人磔諸市東土以寧遷陝西叅政未行拜都  
察院右僉都御史整飭薊鎮邊務在鎮日夜庀戰守  
具起居庸盡山海關初修石垣四萬丈甃敵臺烽堠

二千六百座有奇分其地為十區區設叅遊兩將軍  
分統健卒合之凡八萬人怒馬堅甲長戟利鍛于時  
薊鎮稱虎豹九關天下隘云鎮薊七年匹馬不得入  
塞世宗褒賚甚優屢晉貳本兵因為相嵩所忌罷歸  
卒年七十七穆宗遣官諭祭葬如卿臣禮著有奏議  
十卷

王夢弼代州人嘉靖乙未進士歷刑科都給事時楚世  
子獄具詔毋覆奏即行刑夢弼欲奏同列懼夢弼曰

楚獄誠無寃但覆奏制也竟三覆奏尋晉都御史巡撫寧夏屢有戰功蔭子進官後襲牧畜獲首功最多督帥欲捷報夢弼曰擣巢功不與臨陣功同有近例但奏遵例擣巢而已謝歸卒賜祭葬如例

姚舜德五臺人嘉靖間貢任饒陽教諭陞衛州學正廣寧前衛教授西事告急烽煙不息詔選邊材可用者以舜德智深勇沈權行巡邊四閱月西事漸寧勅賜五品俸寧夏勒碑誌功

亢慶鴻崢縣人嘉靖間貢知陝西同官縣建奎光樓修  
濟陽永壽諸寨為縣防守為政日久民甚德之

董暘繁峙人幼膂力過人就武職累戰奮不顧身解太  
原圍平宣府清風之亂以功陞遊擊將軍嘉靖間敵  
入馬市口暘血戰死之贈鎮國將軍建褒忠祠春秋  
祀之子一奎一元皆歷陞總兵都督并推良將

李楠崢縣人萬歷丁丑進士授刑部陝西司主事屢攝  
湖廣浙江諸司事歷員外郎中出守直隸鳳翔府補



保定府遷陝西副使分巡江西尋改靖邊兵備親歷川原籌邊務屢疏乞身七年復起陝西副使分巡河內遷本省按察使歷布政使擢巡撫楠起家刑曹洊歷開府清介公正及持節西陲積馘斬為京觀城垣屹如金湯戰苦功高朝廷特以璽書褒之

楊恂字伯純代州人萬曆十一年進士授行人擢刑科給事中錦衣冗官多至二千人請大加裁汰不用累遷戶科都給事中征倭師多冒破帑金請嚴勅邊臣

而劾武庫郎劉黃裳侵耗黃裳卒罷尋上節財四議  
格不行御史冀體極論首輔趙志皋貶三秩復斥為  
民恂論志皋并及張位曰今之議執政者僉曰擬旨  
失當也貪鄙無為也是固可憂而所憂有大於是者  
許茂樞罷閒錦衣厚齎金玉為奸被人緝獲使大臣  
清節素孚彼安敢冒昧如此乃緝獲者被責而行賄  
者不問欲天下澄清其可得耶可憂者一楊應龍負  
固不服執政貪其重餌與之交通如近日綦江捕獲

奸人得所投本兵及提督巡捕私書其餘四緘及黃金五百白金千虎豹皮數十不言所投臣細詢播人始囁嚅言曰求票擬耳夫票擬輔臣是也而使小醜得以利動哉可憂者二推陞者吏部職也邇來剏專擅之說以蠱惑聖聰陛下入其言而疑之於是內託上意外諉廷推或正或陪惟意所欲苟兩者俱無當則駁令更推少不如意譴謫加焉倘謂簡在帝心非政府所預何所用者非梓里姻親則門牆密契也如

是而猶曰吏部專擅乎可憂者三言官天子耳目糾繩獻納其職也邇來進朋黨之說以激聖怒陛下納其譖而惡之於是假託天威肆行胸臆非顯斥於建白之時則陰中於遷除之日倘謂斷自宸衷無可挽救何所斥者非宿昔積怨則近日深讐也如是而猶謂言官結黨乎可憂者四首輔志皋日薄西山固無足責位素負物望乃所為若斯且其機械獨深朋邪日衆將來之禍更有難言者請罷志皋而防位嚴飭

陳干陞沈一貫母效二人所為疏入忤旨以原品調陝西按察經歷引疾歸久之吏部尚書蔡國珍起廢及恂未召卒

楊夢弼五臺人萬曆庚子舉人任浙川蝗不入境時萑苻盜起親詣賊壘諭以順逆賊衆拜伏調榮澤擒巨憝祝布論如法闔境稱快陞陝西鞏昌同知撫按交疏懇留士民復詣闕請遂改授開封同知本府儀封王所為不軌與撫按議奏撫按難之夢弼曰孔子墮

三都強公室今強藩不法安忍坐視遂詣闕陳情王懼遺金十萬即將原金解奏詔削王籍為庶人名震中州神宗親書御屏曰天下清官第二員賜勅褒美丁父喪歸親築塋壘三年內形毀骨立以哀毀卒

張鳳翼代州人萬曆四十一年進士授戶部主事歷廣寧兵備副使憂歸天啟初起右叅政飭遵化兵備三年五月擢右僉都御史巡撫遼東請專守關門與樞輔孫承宗異議內艱歸六年秋起巡撫保定明年九

月以三王之藩加兵部右侍郎進右都御史兼兵部  
右侍郎總督薊遼崇禎元年謝病去三年起總督薊  
遼保定軍務與諸將馬世龍等協謀復四城進太子  
少保兵部尚書世廕錦衣指揮僉事鳳翼以西協單  
弱疏陳增良將宿重兵備火器預軍儲遠哨探數事  
從之已復謝病去久之召為兵部尚書六年二月與  
吏部尚書李長庚召對平臺諭以為國任事潔已率  
屬鳳翼頓首退尋以宣大兵寡上言國初額軍宣府

十五萬一千今止六萬七千大同十三萬五千今止  
七萬五千乞兩鎮各增募萬人分營訓練且月餉止  
五錢安能致赴桓之士乞一人食二餉從之七年以  
恢復功加太子太保請命三邊總督兼督河南山西  
湖廣軍務賊將南犯請移江北巡撫楊一鵬鎮鳳陽  
溫體仁不聽八年鳳陽陷戴罪視事請令朱大典鎮  
鳳陽推盧象升為總理鳳翼又言勦賊之役原議集  
兵七萬二千隨賊所向以殄滅為期督臣以三萬分



布豫楚數千里地力薄又久戍生疾故尤世威徐來  
朝俱潰以二萬人布散三秦千里內勢分又孤軍無  
援故艾萬年曹文詔俱敗今既益以祖寬李重鎮倪  
寵牟文綬兵萬二千又募楚兵七千合九萬有奇兵  
力厚矣賊在關內者屬總督關外者屬總理倘賊盡  
出關則總督合勦於豫盡入關則總理合勦於秦臣  
更有慮者賊號三四十萬更番迭出勢衆而力合我  
零星四應勢寡而力分賊所至因糧於我人皆宿飽

我所至樵蘇後爨動輒呼庚賊馬多行疾一日而十舍可至我步多行緩三日而重繭難馳衆寡饑飽勞逸之勢相懸如此賊何日平乞嚴勅兩督臣以一二萬人為一軍俾前茅後勁中權聯絡相貫然後可制賊而不為賊制今賊大勢東行北有黃河南有長江東有漕渠彼無舟楫豈能飛越我兵從西北窮追猶易為力此防河扼險目前要策所當申飭者也上稱善命速行之鳳翼自請督師討賊不允九年請勅河

南鄖陽陝西三巡撫各督將吏扼防毋使軼出四川  
湖廣兩巡撫移師近界聽援勦而總理二臣以大軍  
入山蹙之且嚴遏米商通販賊可盡殄上以為然七  
月賜上方劍盡督諸鎮勤王兵治軍書不休九月朔  
卒奪官十一年七月論前勦寇功詔叙復自庚辰後  
易中樞十四人皆不久獲罪鳳翼獨居位五載言官  
屢劾皆不聽

孫傳庭字伯雅振武衛人自父以上四世舉於鄉傳庭

儀表碩碩沈毅多籌略萬曆四十七年聯雋進士授永城知縣以才調商邱天啟初白蓮賊黨伏歸德傳庭弭其變擢吏部驗封主事屢遷稽勲郎中請告歸崇禎時佐有司禦流寇城西北垣倏塌數十丈散家貲督修令兵數百陣於郊而築於郭城獲全八年秋起驗封郎中時時談兵當事羣目為邊才超遷順天府丞九年四月擢右僉都御史巡撫陝西召見平臺面陳方略上稱善傳庭慨然任平賊練舊卒三千人

為標兵賊整齊王據商雒檄副將羅尚文擊斬之時  
高迎祥最強拓養坤黨最衆所謂闖王蝎子塊也迎  
祥至盤屋傳庭策其飢疲親擊於黑水峪四日三捷  
生致之闕下餘衆殲殆盡增秩一等拓養坤懼及其  
黨張耀文來降傳庭復清屯軍得守兵九千餉銀一  
十四萬兩有奇米麥二萬石有奇上命諸撫以陝西  
為法而兵部尚書楊嗣昌嫉之時議合勦計用兵十  
二萬加餉至二百八十萬限百日平賊令傳庭扼商

雒傳庭言兵貴精不貴多恐致潰蹶且民不堪重困  
又言賊入商雒而臣不能禦則治臣罪若臣扼商雒  
而踰期不能滅賊誤勦事者必非臣嗣昌益銜之十  
一年春坐失援漢陰石泉削加秩大天王等犯慶陽  
寶雞傳庭復簡勝兵六千人繇商雒還軍戰合水破  
走之獲其二子會過天星混天星等逼澄城復分兵  
五道力戰楊家嶺黃龍山大敗賊大天王遂降傳庭  
駐中部率標兵東逼而檄曹變蛟等從慶陽西拒且

伏兵三水淳化間賊飢出掠傅庭一日夜馳二百五十里賊驚西奔至職田莊遇伏走寶雞復折而走隴州皆遇伏凡三敗賊死無算過天星流天星並降又討平漢中餘賊降鄠縣一條龍城固搖天動遺黨闖將以二十騎繇秦嶺南遁入豫關中羣盜悉平上大喜嘉獎備至河南賊羅汝才馬進忠賀一龍左金王等十三部西窺潼關傅庭計曰天下大寇盡在此矣乃引兵東賊退追出關連戰閬鄉靈寶山間賊大敗

貫其營而東復自東而西賊窘甚忽得熊文燦檄謂  
毋妬吾撫功傳庭快快還嗣昌抑將士功不奏咸解  
體十月召入衛俄擢兵部右侍郎兼右僉都御史督  
諸鎮援軍賜尚方劍十二年正月總督保定山東河  
南軍務二月至建昌時嗣昌已入閣傳庭又與總監  
高起潛抵牾遂以疏請陞見上詰責督軍大學士劉  
宇亮亦委咎傳庭詔下勘議斥為民十三年正月命  
長繫待決及文燦撫事壞嗣昌敗上漸思傳庭兵部



尚書陳新甲偕庭臣多薦之十五年正月詔起兵部  
右侍郎召見傳庭指陳形勢上勞獎甚至賜酒饌銀  
幣命督京軍救開封傳庭兼程馳赴會汪喬年敗歿  
賀人龍潰入關中即命往代且諭密誅人龍傳庭與  
巡撫張爾忠等謀召人龍斬之而撫定其部曲益日  
夜治軍六月上遣御史蘇京趣出關九月師抵潼關  
而開封已陷李自成迎戰於邠縣之塚頭鋒高傑等  
逐北三十里羅汝才援自成後部將左勦蕭慎鼎衆

潰傳庭走鞏縣由孟縣入關執斬慎鼎而勦出馬二千匹以贖是役也天大雨糧不至士卒採青柿以食凍且餒故敗豫人謂之柿園之役上令圖功自贖傳庭益募勇士開屯田繕器積粟令三家出一壯丁置火車三萬輛載火砲甲仗戰則驅以拒馬止則環以自衛十六年五月命兼督河南四川軍務進兵部尚書改稱督師加督山西湖廣貴州及江南北軍務賜尚方劍傳庭請以總兵牛成虎將前鋒高傑將中軍

王定官撫民將延寧兵為後勁而以白廣恩統火車營檄左良玉赴汝寧夾擊時關中紳士咸請趣傅庭出關上亦急平賊頻責讓傅庭不得已乃令陝西巡撫馮師孔駐商雒而遣成虎以三千餘騎先趨雒陽至澠池擊走賊遊兵八月遂統大軍出至滋澗下馬搜伏賊走又追至汝州賊盡奔寶豐九月師次汝州偽都尉李養純降謀報賊老營在唐縣偽將吏屯寶豐傅庭遣將襲唐縣而自趨攻寶豐自成來援廣恩

傑夾擊再戰自成敗走遂克寶豐他將亦克唐縣師次邾縣賊萬騎逆戰復大破之軍聲大振會天久雨道寧糧車不能前攻破邾縣裁得馬騾數百殺食之後軍譟於汝州陰通賊賊大至傅庭乃分軍三令廣恩由大道已與傑由小道還軍迎糧而留副將陳永福為後拒戒毋動前軍既移後軍亂永福雖斬之不能止亦引退賊追及之二十一日官軍還戰賊置陣五重官軍力戰已破其三重遇驍騎陣稍動推火車

者駭棄車走馬軍亦走賊騎乘之官軍死者四萬餘人失亡輜重馬騾無算傅庭與傑以數千人走河北從山西渡河轉入潼關廣恩亦從之賊隨至傑請徑入西安憑堅城固守傅庭曰賊一入關則全秦糜沸秦人尚為我用乎不納十月六日自成攻關廣恩戰敗傑不救傅庭登陴固守賊分兵從南山遶出其背夾攻官軍大敗關城遂陷傅庭憤躍馬揮刀大呼衝入賊陣戰死年五十一後數日西安亦陷時命核實

恤典竟不逮云

高斗垣繁峙人崇禎十二年由恩貢生授西平知縣為人孤鯁以清慎得民城陷被執不屈死

崔賢代州人舉于鄉崇禎中知新河縣九年七月以殉難聞

國朝

馮如京字秋水代州人戊辰恩貢授永平府灤州知州興利除弊勸善懲惡清驛累招流移課農桑興學校

三年治成陞本府同知

國朝定鼎授永平知府尋陞陝西榆林副使兵備靖邊時巨盜黃色俊逼靖邊城如京率標下數百人擊之破其巢而殲焉事聞

賜賚有加遷西寧叅政適西河猢貍叛劫甘州院鎮皆被害如京鼓勵士卒且戰且守三閱月賊不得逞事平陞爵一級遷浙江金衢嚴分守叅政平巨寇翁大洋功陞江南右布政乙未冬

詔求直言疏崇理學謹兵權實京倉慎邊守四事廷論黷  
之擢廣東左布政使督撫以卓異舉己亥覲

京師疏別荒稅以足徵輸禁雜派以供惟正嚴委署以  
肅官方移重鎮以清海氛四事切指粵事甚悉

朝廷嘉之下部次第舉行歸粵至江南壽州念母夫人  
年高不便迎養乞致仕歸里承顏侍奉者十數年及  
歿哀毀骨立服闋未幾而卒年六十八歲

賜祭葬所著有秋水集粵槎日紀北征紀略宮詞春秋大



成聖賢正諦古今雁字詩選行世又有一統志略歷  
代詩錄理學鈔史疑等集藏於家

高鼎大同籍五臺人少健捷善走雙目有光夜中能遠  
辨細物精火器落飛鳥不少爽闊寇焚掠糾里中諸  
少年自保寇不敢窺

國初慨然請効行間

朝廷嘉之命為叅將歷副將至總兵從經略穆勦吳逆  
會王輔臣叛鼎被羈留嘗具賊中虛實密遣人歸報

及大兵至關山遂以衆來會將軍趙委守烽火臺烽火臺平以功召至引

見授福建興化總兵未至改四川松潘總兵蓋將軍趙以黃勝漳臘制臺弓楨之間為全蜀要扞非鼎不克勝任也久之年老請致仕

聖祖仁皇帝幸雲中駐

蹕里第

召見慰勞為

題邊山夙將四字以賜焉

張琳崞縣弟子員寧武賊起攻大陽堡琳率衆禦之殺賊三人既而賊大至力戰為賊殺

詔旌其門

李旦時崞縣貢生寧武賊起練鄉勇禦之治一棺以示必死賊至力戰歿弟子員舍玉見父被執誓殺賊報仇是日亦歿於陣

詔旌其門

亢得時滿洲籍崞縣人少穎悟十二歲成諸生大兵入關以書生仗策謁軍門陳機宜累官中外所至輒樹績順治十五年督漕運兼兵部尚書禁包攬代納之弊權緩急度支之宜克舉其職次年歿於王事得時居鄉雅以任恤著比歿皆為流涕

閻士樟五臺人以貢生任交河知縣補德興再補永寧士樟有才略姜瓖之亂避居山谷中潛入城協令守禦踰年城獲全在交河招集流亡復業者日至在德

興擒盜魁論如法餘悉歸農嘗設祭田百畝祀始祖  
捐萬金賑飢其卒也里中皆為流涕

保德州

宋

朱光河曲人初仕周領永州防禦使宋受禪以翊戴功  
擢龍捷右廂指揮領軍征南伐竹為筏倚道厲淮擾  
亂南寇得利而歸帝曰他日見君面今日見君心吾  
事就矣歷任節度使太祖遊相扶杖造朝乞老卒封

沛郡開國公

金

郭汝翼其先平陽人徙居保德遂占籍焉族繁盛俱業  
儒汝翼與弟汝霖俱以易學鄉舉汝翼授朝請郎集  
賢院校理

元

狄元昌保德人宋樞密武襄公青後弟元勝元德元祿  
俱以人才選授提領十二郡管郭等諸驛傳元昌善

騎射多藝能鄉里有窘迫求之者指囷貸施臨終取券焚之曰吾身後不可令子孫徵負於人累官兵部侍郎天水郡伯子八孫十二皆貴顯

狄琮字子玉保德人軀幹魁梧尚氣節有并州豪傑風讀書了大義慨然以功名為志辭親詣京識者薦其名于裕宗宿衛晉王至元庚寅王封梁開藩雲南擢奉議大夫王府司馬府中事咸諮之王改封晉鎮邊西陲初內史府轉朝列大夫內史府司馬暇則講貫

經訓凡諷諫必盡忠王母嘉納未幾進大中大夫知  
無不言大德辛丑王薨哭之慟至嘔血曰吾尚可以  
生乎癸卯召子東山諭之曰為人臣子惟忠與孝爾  
其勿違言訖梁棟間有聲如磬視之逝矣子東山為  
人倜儻不羈善繼先志剛正明達有為有守初仕中  
書舍人河間治監察御史同知大都路都總管以材  
選授中書禮部郎中進大中大夫同僉宣徽院事尋  
擢前官



郭伯順汝翼之後性惇朴通五經尤精於易蔚為儒宗  
恬於利祿有司屢辟不就鄉里敬尚士類多從之大  
德八年應奉翰林文字承事郎同知訓誥兼修國史  
編修官

明

李貫字一之河曲人弘治己酉舉人授成都知縣補孟  
縣有能聲時流賊趙風子等攻掠山左郡縣薦為曹  
州知州賊至城下人皆惶懼貫厲聲拊衆曰吾輩食

君祿而貽君父憂為生民恥何顏立天地間能為我  
殺賊拒敵者國有重賞否則妻子為擒其何能活眾  
奮遂率其子九麟募城中少年百人邀賊截擊斬獲  
數十賊遂奔遁事聞優賞有差旋移祁州築紫金等  
隘口一十八處清慎果毅嚴疆用奠以母老乞終養  
歸

李文翰字內英河曲人正德丁卯舉人授儀真知縣政  
尚平易嘗梓農書教民樹檣尤崇士類己卯冬武宗

南巡供役浩繁悉力經理不辭勞瘁歷任六年擢知  
商州又六載陞河澗府同知律身莊肅與人和易

張綬保德人正德間貢居鄉恂恂奉親惟謹力學篤行  
人無間言始丁內艱不飲酒茹葷比葬廬墓三年入  
太學人望從之往本州與河曲歲辦額設大為民病  
綬齋心屬稿祈存留本處備官軍歲支詔可其奏後  
授山東齊東縣丞

徐堯臣保德人嘉靖間以百戶統軍於唐家會鑿冰敵

衆踏冰入犯堯臣拒堵力戰面中五矢刀傷七處歿於陣事聞恤錄加陞副千戶

戴辰所千戶嘉靖三十七年寇圍豐阜城奉檄往援語妻趙曰後事畀爾謹奉舅撫孤轉戰重圍身中一十七創力竭而死寇亦解去事聞贈明威將軍指揮僉事

徐棟浩之子官至老營副總兵隆慶四年陣亡贈都督指揮僉事

韓友范字一咸領萬厯戊午鄉薦令鹿邑守慶陽累以  
禦寇功陞神木道副使城陷夜以金簪自刺不死後  
罵賊遇害

姜名武字我揚保德州人舉天啟二年武會試授大同  
威遠守備崇禎初遷大水峪游擊築杏山城遷宣府  
西城叅將擊斬大盜王科移守宣府右衛擢通州副  
總兵護諸陵以故官典保定總督楊文岳中軍兼忠  
勇營團練事十五年從文岳往援開封左良玉軍潰

諸營悉奔獨名武一軍堅壁不動侵晨賊大至督麾  
下血戰殺數百人力竭被執大罵為賊磔死贈特進  
榮祿大夫右都督蔭外衛世襲總旗十七年其子援  
王來聘甄奇傑例乃議贈特進光祿大夫左都督世  
蔭錦衣百戶而部議上不果行

高日暘字翼皇崇禎中兵部進士官寧武關遊擊闖賊  
陷城同總兵周遇吉死之

常道行字昭五工制藝兩擬省元不售以貢授黑水監

正闖寇陷城死之又楊于堦字翼極崇禎朝歲貢令  
河南濟源縣亦死闖難

國朝

呂朝京保德州人性厚而烈順治七年牛逆破州城大兵  
來勦朝京念復城後玉石莫繇分若說賊使解甲歸降  
庶有鳩乎因詣主者請入城招諭主者許之既至懇曲  
啟導牛顧謂來伺問叱令斬之朝京不少動神色如常  
張射斗保德州人幼讀書知大義及為諸生餽於庠志氣

益激昂順治七年牛賊入州城嚴刑督吏民為守射  
斗憤甚日夜思誅之謀定未發浙人章正賓欲媚牛  
以情告牛將殺射斗而懼其得人心猝莫敢動佯以  
好誘入文廟遽執而殺之後州人卒殺牛正賓亦為  
府谷賊所殺

姜宗呂字琅璵保德州人明右都督名武子名武援開  
封血戰死於柳樹坡宗呂往求父屍不可得遂詣闕  
上書請卹於楊總督文岳所得父故衣招魂以斂又



以父所得卹典不應法復詣闕陳請

國朝順治戊子舉於鄉己丑姜逆之變守備牛化麟應賊列劍鉞堦下逼宗呂至將加害宗呂斥以大義賊囁嚅不能出聲宗呂徐步去比賊平州人多以從賊伏法獨宗呂得免己亥成進士授濰縣知縣未蒞任卒人胥惜之

姜櫛字仲端號崑麓保德州人祖名武前後軍都督僉事崇禎十五年殉節於朱仙鎮之柳樹坡父宗呂順

治己亥進士櫺中戊午鄉試乙丑成進士知麻城縣  
入為行人司行人選戶科給事中

命副己卯江南主考官竣事內陞鴻臚寺少卿仍帶戶科  
提督兩浙學政擢都察院僉都御史副都御史尋擢  
工部右侍郎轉吏部左侍郎以病卒於官馳驛歸葬  
褒卹為獨厚當其官麻城也甫下車定徵收法設庫書  
六人擇謹實者司稽察賦畢輸而無追呼擾定保甲  
法俾民罷去守堡樓役守家而鄰右助之三年無盜

警麻城俗奸僧多蝕行商嚴治不少貸曰賈人亦吾人柰何令流離縣界耶在戶科疏請核捐納清兵餉持議侃侃典試得方苞蔣錫震劉學洙潘旂郁士超輩數十人胥有聲督制學文尚清肅力矯醲肥之習間不足取額輒訪前代忠臣烈士裔足之涖湖州有以溫寶忠嫡孫聞者核再四曰慎無使溫體仁家冒得之涖處州有老諸生不克書訖卷者問之劉文成公後也准給頂杭織造教雅遇之淡如而教嘗對

上曰一錢不要一情不聽蓋公好也

南巡

賜御書廣靜匾癸未絲僉憲擢副憲甫六日甲申受工侍  
之

命業得疾而右侍郎例稽察錢局檢點不少弛病增劇十  
月復攝刑部右侍郎事旋晉秩吏侍其距卒亦甫六  
日也班行胥惜之

山西通志卷一百二十八